

Temeljem odredaba člana 6. stav 1. tačka d) a u vezi s odredbama člana 24. stav 3. Zakona o deminiranju u Bosni i Hercegovini («Sl.glasnik Bosne i Hercegovine» br.5/02), odredaba tačke III i) Odluke o osnivanju Komisije za deminiranje u Bosni i Hercegovini («Sl.glasnik Bosne i Hercegovine» br.16/02), a u vezi s odredbama Standarda za uklanjanje mina/NUS-a u BiH (odobrenog od strane Komisije za deminiranje u Bosni i Hercegovini 01.06.2003. i 15.03.2004. godine) te Standarda za upozoravanje na mine u BiH, direktor Centra za uklanjanje mina u Bosni i Hercegovini, po pribavljenom odobrenju Komisije za deminiranje u Bosni i Hercegovini br. _____ od _____ 200_ . godine, donosi:

P R A V I L N I K **O AKREDITACIJI I OVLAŠTENJU LICA U** **HUMANITARNOM DEMINIRANJU**

I - OPĆE ODREDBE

Član 1.

(1) Ovim Pravilnikom o akreditaciji i ovlaštenju lica u humanitarnom deminiranju (u daljem tekstu: Pravilnik) propisuju se uvjeti za izdavanje, postupak i način izdavanja, obrazac, izgled i sadržaj akreditacije za obavljanje poslova protivminskog djelovanja (u daljem tekstu: akreditacija za PMD) i ovlaštenja za obavljanje poslova protivminskog djelovanja (u daljnjem tekstu: ovlaštenje za PMD), upotreba, zamjena, oduzimanje akreditacije i/ili ovlaštenja, i vođenje evidencije o istima.

Član 2.

(1) Akreditacija je isprava koja sadrži identifikacijske podatke osobe – nosioca akreditacije, identifikacijski broj (broj iz evidencije BHMAC-a), sliku, krvnu grupu kao i podatak o postignutim kvalifikacijama, koja zamjenjuje deminersku knjižicu.

(2) Ovlaštenje je isprava koja sadrži odobrenje za rad osobe – nosioca ovlaštenja u vremenskom terminu preciziranom na samom ovlaštenju, a vezano je za kvalifikacije upisane u akreditaciju.

Član 3.

(1) Akreditacija i ovlaštenje za obavljanje poslova PMD su javne isprave.

(2) Lice koje se bavi poslovima PMD mora posjedovati akreditaciju i ovlaštenje za obavljanje poslova PMD predviđene ovim Pravilnikom.

II - UVJETI I NAČIN IZDAVANJA I ODUZIMANJA AKREDITACIJE I **OVLAŠTENJA**

Akreditacija

Član 4.

(1) Postupak za izdavanje akreditacije započinje podnošenjem pismenog zahtjeva sa priložima predviđenim ovim Pravilnikom.

(2) Zahtjev za izdavanje akreditacije i/ili ovlaštenja se podnosi Centru za uklanjanje mina u Bosni i Hercegovini (u daljem tekstu: BHMAC) na jednom od službenih jezika u upotrebi u Bosni i Hercegovini.

(3) Zahtjev za izdavanje akreditacije i/ili ovlaštenja se podnosi lično.

Član 5.

(1) Uz zahtjev za izdavanje prve akreditacije podnosilac je dužan priložiti javne isprave kojima dokazuje:

- a) da ima navršenih osamnaest godina života,
- b) da ima najmanje srednju stručnu spremu III stepena,
- c) da nije osuđen za krivično djelo protiv Bosne i Hercegovine, za krivično djelo protiv života i tijela ili protiv imovine; za druga krivična djela s elementom nasilja, koristoljublja i niskih pobuda (u daljem tekstu: Uvjerenje o nekažnjavanju)
- d) da je duševno, fizički i zdravstveno sposoban za obavljanje poslova deminiranja (u daljem tekstu: ljekarsko uvjerenje za poslove deminiranja),
- e) da ima položen odgovarajući stručni ispit (da je završio odgovarajuću specijalističku obuku za neke od aktivnosti protuminskih akcija po programu usaglašenom sa Standardom za uklanjanje mina i NUS-a u Bosni i Hercegovini, Standardom za upozoravanje na mine i Standardom za obuke, a koji je odobren od strane BHMAC-a, u daljem tekstu: certifikat).

(2) U zahtjevu mora biti naznačen jedinstveni matični broj (ukoliko nije vidljiv u nekoj od priloženih isprava), krvna grupa podnosioca zahtjeva (koja se dokazuje odgovarajućim dokumentom zdravstvene ustanove), te također priložena jedna fotografija podnosioca zahtjeva dimenzija 35x45 mm u boji.

Član 6.

(1) Godine starosti se dokazuju kopijom liče karte ili rodnog lista.

(2) Posjedovanje odgovarajuće stručne spreme se dokazuje ovjerenom kopijom svjedodžbe/svjedočanstva o završenoj srednjoj školi i stečenom zvanju.

(3) Neosuđivanost za krivična djela iz čl.5 st.1 tač.c) se dokazuje uvjerenjem o nekažnjavanju izdanom od strane nadležnog organa kod kojeg se vodi kaznena evidencija.

(4) Duševna, fizička i zdravstvena sposobnost za obavljanje poslova deminiranja dokazuje se ljekarskim uvjerenjem o sposobnosti za vršenje poslova deminiranja izdanim od nadležne zdravstvene ustanove ovlaštene za pregled radnika na radnim mjestima sa povećanim rizikom, koje ne može biti starije od tri mjeseca.

(5) Osposobljenost za obavljanje poslova u humanitarnom deminiranju dokazuje se ovjerenom kopijom certifikata.


(6) Ljekarsko uvjerenje i uvjerenje o nekažnjavanju dostavljaju se u originalu, a ostala dokumentacija u ovjerenom kopiji.

Ovlaštenje

Član 7.

(1) Osobe koje posjeduju akreditaciju i bave se poslovima protivminskih akcija dobivaju ovlaštenja za rad u trajanju od godinu dana od dana izdavanja ljekarskog uvjerenja da su sposobni za obavljanje poslova PMD.

(2) Uz zahtjev za izdavanje ovlaštenja obavezno se prilaže:

 je osoba za koju je pravomoćnom odlukom utvrđeno da je krivično odgovoran za određeno k.d.

- a) prethodno ovlaštenje (ukoliko ga tražilac posjeduje),
- b) ljekarsko uvjerenje, i
- c) uvjerenje o nekažnjavanju.

Član 8.

- (1) Nakon razmatranja potpunog i osnovanog zahtjeva, BHMAC formira personalni dosije o svakoj osobi za koju je podnesen zahtjev za izdavanje ovlaštenja.
- (2) Personalni dosije iz prethodnog stava ovog člana sadrži svu relevantnu dokumentaciju koja je propisana u čl.5 ovog Pravilnika..

Član 9.

- (1) BHMAC u roku od 3 dana od dana podnošenja potpunog zahtjeva izdaje akreditaciju, odnosno ovlaštenje za rad deminera.
- (2) Akreditacija i ovlaštenje imaju identičan identifikacijski broj (ID broj).

Član 10.

- (1) Ukoliko dokumentacija priložena uz zahtjev sadrži neki nedostatak ili je nepotpuna, podnosilac zahtjeva se, u pismenoj formi, poziva da istu upotpuni valjanim dokumentima, sve u roku od tri dana od dana prijema zahtjeva.
- (2) Podnosilac zahtjeva je dužan postupiti po pozivu u roku od sedam dana od dana prijema istog.
- (3) Ukoliko i nakon ostavljenog roka iz prethodnog stava ovog člana dokumentacija ne bude valjana, zahtjev se zaključkom odbija kao nepotpun.
- (4) Na zaključak iz prethodnog stava ovog člana dopuštena je žalba u roku od 8 dana od dana prijema istog.
- (5) Žalba na zaključak se izjavljuje direktoru BHMAC-a koji u roku od 3 dana, od dana prijema, istu rješava.
- (6) Rješenje po žalbi na zaključak je konačno.



- (1) Ovlaštenje se, po isteku njegove važnosti, zanavlja na način preciziran odredbama člana 7. ovog Pravilnika.
- (2) Ukoliko lice za koje se traži izdavanje ili zanavljanje ovlaštenja nije bilo anagažovano na poslovima humanitarnog deminiranja jednu godinu i više, dužno je pristupiti testiranju pred Komisijom BHMAC-a, a u cilju provjere znanja i stručnosti.
- (3) Testiranje iz prethodnog stava će se provesti i u slučaju oduzimanja ovlaštenja.

Oduzimanje akreditacije / ovlaštenja

Član 12.

- (1) Ukoliko osoblje BHMAC-a ovlašteno za vršenje stručnog nadzora, tokom stručnog nadzora nad obavljanjem poslova humanitarnog deminiranja, uoče nepravilnosti koje utiču na sigurnost deminera, drugih lica uključenih u humanitarno deminiranje, te budućih korisnika, ovlašteni su na licu mjesta oduzeti ovlaštenje za rad odnosnog deminera, ili vođe tima, ili osobe odgovorne za operacije/osiguranje kvaliteta deminerske organizacije i iste udaljiti sa deminerskog radilišta.

(2) Konstatacija nepravilnosti i oduzimanja ovlaštenja za rad licima iz st.1 ovog člana unosi se u zapisnik o stručnom nadzoru nad obavljanjem poslova deminiranja, na osnovu kojeg inspektor Kontrole kvaliteta donosi rješenje o oduzimanju ovlaštenja u roku od tri dana.

(3) Pod nepravilnostima iz stava 1. ovog člana smatra se:

- a) nekorištenje minimalne zaštitne opreme,
- b) nepoštivanje minimalnih sigurnosnih udaljenosti na radilištu,
- c) korištenje metal detektora koji ne zadovoljavaju minimalne uslove propisane Standardom za uklanjanje mina/NUS-a u BiH,
- d) korištenje nedozvoljenih alata za rad u rizičnoj površini,
- e) rad pod uticajem alkohola ili psihotropnih supstanci,
- f) ometanje, onemogućavanje ili sprečavanje ovlaštenog lica u vršenju stručnog nadzora.

Član 13.

(1) Ovlaštenje se oduzima na period od tri mjeseca, počev od dana oduzimanja na deminerskom radilištu.

(2) Ovlaštenje će se oduzeti na period od šest mjeseci licu za koje Istražni odbor BHMACE-a da preporuku da mu se oduzme, nakon provedene istrage u slučaju minske ili deminerske nesreće/incidentata.

(3) U slučaju da se nakon izdavanja akreditacije/ovlaštenja došlo do pouzdanog saznanja da je isto izdato na osnovu neistinite, odnosno falsifikovane dokumentacije propisane u čl.6 ovog Pravilnika, isto će se oduzeti trajno, a protiv lica koje je takvu dokumentaciju zloupotrijebilo će se podnijeti izvještaj nadležnom organu za krivično gonjenje.

(4) Rješenje o oduzimanju ovlaštenja se dostavlja licu kojem je oduzeto, organizaciji za koju lice radi i višem referentu za akreditacije i stručnu regulativu u roku od pet dana od dana oduzimanja ovlaštenja.

Član 14.

(1) Protiv rješenja o oduzimanju ovlaštenja može se izjaviti žalba u roku od osam dana od dana prijema istog.

(2) Žalbu može izjaviti lice kojem je oduzeto ovlaštenje, kao i organizacija kod koje je lice bilo angažovano kada mu je ovlaštenje oduzeto.

(3) Žalba ne odlaže izvršenje rješenja.

(4) Žalba se izjavljuje direktoru BHMACE-a pismenim putem, uz obrazloženje i eventualne dokaze.

(5) Direktor BHMACE-a rješava po žalbi u roku od tri dana od dana prijema iste.

(6) Rješenje po žalbi je konačno.

Član 15.

Lice kojem ovlaštenje bude oduzeto tri puta u vremenskom periodu od dvije godine ne može se baviti aktivnostima humanitarnog deminiranja u Bosni i Hercegovini, te će mu shodno tome ovlaštenje biti oduzeto trajno, a u postupku oduzimanja će se primjenjivati odredbe čl.13 st.4 i čl.14 ovog Pravilnika.

Član 16.

(1) Obrazac ovlaštenja i akreditacije je izrađen na punom papiru i zaštićen omotom od prozirne plastične mase.

(2) Ovlaštenje i akreditacija su pravougaonog oblika, dimenzija 95x65 mm.

(3) Ovlaštenje se izdaje prema Obrascu broj 1. koji je štampan uz ovaj Pravilnik i čini njegov sastavni dio.

(4) Sve troškove štampanja i izdavanja ovlaštenja i akreditacije snosi BHMAC.

III - UPOTREBA OVLAŠTENJA I AKREDITACIJE**Član 17.**

(1) Sve osobe, prilikom neposrednog obavljanja poslova u humanitarnom deminiranju, su dužne posjedovati ovlaštenje i akreditaciju i iste, u kompletu, predložiti na zahtjev ovlaštenih službenika BHMAC-a koji vrše poslove stručnog nadzora nad obavljanjem poslova protuminskog djelovanja.

IV - ZAMJENA AKREDITACIJE I/ILI OVLAŠTENJA**Član 18.**

Dotrajalo i oštećeno ovlaštenje i/ili akreditaciju nosilac je dužan zamjeniti kod izdavaoca.

Član 19.

U slučaju gubitka ovlaštenja i/ili akreditacije, nosilac je dužan da, najkasnije u roku od tri dana od dana gubitka, o tome pismeno obavijesti BHMAC.

V - EVIDENCIJA**Član 20.**

(1) Viši referent za akreditacije i stručnu regulativu vodi evidenciju o oduzetim ovlaštenjima, rokovima, evidentira podatke o provjerama znanja nakon oduzimanja ovlaštenja te izdavanju novih ovlaštenja po protoku roka oduzimanja.

(2) Evidencija iz prethodnog stava sadrži:

a) redni broj,

b) prezime i ime osobe koja se bavi poslovima humanitarnog deminiranja,

c) identifikacijski broj akreditacije/ovlaštenja,

d) datum izdavanja ovlaštenja

e) datum izdavanja akreditacije,

f) datum do kojeg vrijedi ovlaštenje,

g) datum vraćanja izdanih isprava,

h) potpis nosioca kod preuzimanja ovlaštenja i akreditacije,

i) potpis nosioca kod vraćanja ovlaštenja i akreditacije.

VI PRELAZNE I ZAVRŠNE ODREDBE

Član 21.

(1) Zahtjevi podneseni do dana stupanja na snagu ovog Pravilnika riješiće se u skladu sa odredbama ovog Pravilnika.


Član 22.

(1) Ovaj Pravilnik stupa na snagu danom odobravanja od strane Komisije za deminiranje u Bosni i Hercegovini.

(2) Pravilnik će biti objavljen u Službenom glasniku Bosne i Hercegovine, kao i na web - stranici BHMAC-a.

Broj: 01-50-7207-1/09
Sarajevo, 23.12. 2009 godine

DIREKTOR
Dušan Gavran




Ovaj Pravilnik o akreditaciji i ovlaštenju lica u humanitarnom deminiranju, u skladu sa članom 6. Zakona o deminiranju u Bosni i Hercegovini („Službeni glasnik BiH“ broj 5/02) odobrila je Komisija za deminiranje u Bosni i Hercegovini, što članovi Komisije ovjeravaju svojim potpisima i pečatom.

Mustafa Alikadić

Darko Vidović

Dragisa Mekić



Broj: 14-5624-2205-1/09

DATUM: 17. 12. 2009.

- lica koja podliježu izdavanju ovlaštenja